

周

易

象

義

易象義卷四

水風井



巽下坎上

井改邑不改井無喪无得往來井井汔至亦未繙井羸其瓶吉 象曰巽乎水

而上水井井養而不窮也改邑不改井乃以剛中也汔至亦未繙井未有功也羸其瓶是以凶也

巽下坎上井卦取巽木坎水木上有水故為井凡鑿井者既以及泉則以木橫其下而水上于木故為井之象彼以木為汲器又只取巽木不取木義皆非也井改邑不改井困反為井坎位下者今位乎上而坎

之剛中不動是邑改而井不改也周禮四井為邑亦  
是實義井之為井也不為汲者喪而竭不為不汲得  
而盈井何與哉往之舊井而井如故來之新井而井  
已成故往來井也然井以汲為用以上出為功蓋  
由井不改故不涸耳苟時值沕至亦未緝井而羸其  
瓶則凶矣豈可以井無得喪而不思所以防其涸沕  
哉上坎水下巽木故為水上于木之象陰中有陽故  
為泉水于井之象統觀全 有井字之象細分二之  
奇耦有井井之象陽往居位陰來居初有來往之象  
坎在上有沕至之象緝井有巽入之象羸瓶有坎險

之象

彖曰巽乎水而上水井乃井之體井養而不窮乃井  
之用惟其巽下乎坎而坎水在上此所以井養而不  
窮也改邑不改井乃以剛中也剛中指九五即泉出  
於中之象困井本相反也坎雖在上在下不同而中  
久陽剛未嘗改也故曰乃以剛中惟不可改則無得  
無喪而往來井井之義已該之矣涸也繻與瓶皆汲  
井之具也汔至亦未繻井則人未獲其井養之利故  
未有功也巽以入井值坎之險則併其瓶而羸之得  
無凶乎觀井之象可以悟人心矣改邑不改井乃以

剛中即人心剛中之象也應感雖萬變不齊而心之  
剛中則一定不改剛中無得無喪而往來變化孰非  
此心之所運乎然觀汜至羸瓶之凶而人心惟危尤  
不可不慎

井水雖無得喪每歲十一月水泉動至八月始水涸  
此陰陽升降之必然者說文曰涸汜也是井亦有汜  
至之時也未濟小狐汜濟皆因坎取義

初六井泥不食舊井無禽 象曰井泥不食下也舊井  
無禽時舍也

初六陰柔居下井雖初鑿及泉而泥尚未之澄也故

為井泥之象夫新邑之井既有泥而泉不可食舊邑  
之井雖無禽而遠弗能汲井以養為功在初尚未之  
能也禽即鮒類象曰井泥不食下也下即謂初泥之  
象也泥而不食初鑿故耳舊井無禽時舍也時方以  
舊井為遠而舍之雖無禽而莫之汲矣

九二井谷射鮒甕敝漏 象曰井谷射鮒無與也

九二剛中泉可汲矣其旁有小谷鮒因其虛而藏之  
而泉且射及于鮒是井有禽矣鮒本井中之禽何害  
于井乎苟在上得完冠汲之非養蓋無窮也柰何汲  
水之甕既敝而漏无以賴其汲養之成功矣甕敝漏

即承羸其瓶之義也此爻與五相值而不相應是二  
之水雖美特由五無完器以汲之坎險故也井卦本  
以陽剛為泉九二之陽既有泉矣與九三密比而旁  
又有谷焉故為井谷之象象曰井谷射鮒無與也蓋  
雖井中有禽而泉本可食特以甕敝漏而不能汲耳  
于井谷射鮒何與哉然則下有賢才而上莫之用于  
賢才何與也

九三井渫不食我為心恻可用汲王明並受其福 象  
曰井渫不食行恻也 求王明受福也

九三陽剛得正去初泥已遠其井渫治其泉清潔可

食柰何三無應于上瓶繡不具故泉可食而人莫之  
食行者過之為我而心惻然矣是井可用汲也但可  
汲在我用汲在人遇汲者之明則井與人並獲其用  
猶陽剛之才遇王者之明則王與賢者並受其福其  
君用之安福尊榮是也井以用汲上出為功三在上  
卦之下故為不食之象三剛得正故為可用汲之象  
象曰井渫不食行惻也人之行者非為井而惻所以  
惻人之不食也求王明受福也汲用固在于王明而  
可用汲者在我即我之所以求王明也故曰賢非后  
固食后非賢固以成厥功其相須之道固而此噫賢



之求王明豈井之食求于人哉井深而人自求食也  
正子貢所謂夫子之求之也其諸異乎人之求之與  
六四井甃無咎 象曰井甃無咎修井也

六四陰柔居得其位然坎體在所當修離下卦而居  
上有改舊為新之意四為坎之郭郭亦有甃之象是  
以離雖舊而甃治則新也其次不與汲存乎其人故  
無咎况修其坎而坎不為險矣象曰修井也井舊雖  
無濟物之功而修井亦得補咎之道蓋學新功之象  
亦于此可識矣

九五井冽寒泉食 象曰寒泉之食中正也

九五陽剛中正而居尊位其德足以養人猶井冽寒泉而人皆可食也一陽在中故有井冽寒泉之象陽剛出險亦有井汲人食之象泉而見食于人莫不被其澤矣坎北方之卦也故曰寒泉象曰中正也陽剛中正之德可以井養而不窮矣

上六井收勿幕有孚元吉 象曰元吉在上大成也

上六居井之上井道之成也然井以上出為功雖緇已收尚當禁止勿幕而惟以博施濟眾為公則同井之人莫不賴其井養之利而孚信其濟物之心矣此所以元善而吉也井至上有收之象六中虛有勿幕

之象象曰大成也收之於上而不覆公之于人而不  
私其斯以為大成之道乎

三井深成已也上則及物故曰大成

澤火革

三 離下  
兌上

革已日乃孚元亨利貞悔亡 象曰革水火相息二女同居其志不相得

革已日乃孚革而信之文明以說大亨以正革而當其悔乃亡天地革而四時成湯武革命順乎天而應乎人革之時大矣哉

離下兌上革卦取兌澤上離火

所當革故為革革謂變革革而人心不孚革之也難矣必已日乃孚焉已即戊己之巳也觀一歲四時離屬兌屬秋夏革為秋由離中納有已土故能革也

火革為澤亦類已土以革之即如後天卦位坤屬已  
土本居離兌之間由已而庚亦取庚革之義十年亦  
自已而後庚革五行兌為金曰革况已土有信義故  
為已日乃孚之象若云已革之日乃孚則六二已日  
乃革之文義又相反矣蓋謂變革最難必已日革之  
乃能孚信于人如此則大亨而利乎正未革雖有悔  
既革而悔可亡此革之道也 彖曰革水火相息澤  
上火下則滅息必革之然後生息二女同居其志不  
相得少上中下志不相得必革之然後可以同居此  
革之所以為革也然其革也必時當已日乃能孚信

於人况其德文明以說離照于未革之先兌說于既  
革之際故大亨无所不通利貞无所不正要皆因其  
宜革者革之以時斯革無不當而其悔亡也可見俗  
元亨利貞之四得而其悔乃亡革之難也如此推是  
革之道也天地聖王亦然天地革而陰陽代謝故四  
時之功成湯武革命順天應人故萬民之心說可見  
時未至也雖天地聖王不能徇時而莫之革惟其時  
而已矣故贊之曰革之時大矣哉時字乃己日亦相  
關

初九羣用黃牛之革 彖曰羣用黃牛不可以有為也

初九陽剛雖有能革之才然事在初位在下或有當  
革者而時則未可為也况離艸初二相為附麗必固  
守中順之德而不敢自用自尊以至妄動斯可矣故  
以鞏用黃牛之革象之黃中色牛順物六二柔順必  
待已曰乃革故也鞏局束革堅韌初剛故也未革則  
宜固守初爻當如是耳象曰不可以有為也不可為  
即是不可革言初當附麗中順以自固守也牛革用  
以固物革字亦取卦名人知變革之為革抑知用堅  
革以鞏固者亦革之義乎

六二已自乃革之征吉無咎 象曰已日革之行有嘉

也

六二柔順文明德本中正且有正應若可革矣但時  
乎在下必待己曰然後革之益以正應在上惟征行  
上進其道吉而無咎曰離象六二有已土在中之象  
玩已日乃革之辭若有所待而又云征吉無咎皆不  
敢自專之意象曰行有嘉也亦不輕許其變動而惟  
征行始有可嘉之功可見己日乃孚而時苟未至則  
不容以遽變矣况己是象惟此爻當之非離中有己  
而何

九三征凶貞厲革言三就有孚 象曰革言三就又何



之矣

九三當上下之交時若可革矣然過剛不正未免輕舉妄動有不善于革者以征則凶也雖正亦危離火炎燥故以是戒之可見徒恃剛明以改革不可也欲通之以明莫若先之以言故九理在所當革者務以訓言開導人心使曉然皆信其當革而再三丁寧以成就之斯可矣革而以言者叙其所以當革之由如商周之誓誥是也上兌有革言之象相隔三爻有三就之象文明兌說有成就之象象曰革言三就又何之矣未革之先能與人畜維擬議至于再三則所革

必成而無疑也

九四悔亡有孚改命吉 象曰改命之吉信志也

九四以剛居柔而有所變革或不免于悔然剛柔相濟去下而由火而澤適當變革之時革所宜革悔

可亡也如此則忠信之德已洽于未革之先是以人心允孚斯有改命之吉夫革而至于改命協吉非革之極善能如是哉此在天地則夏秋之交在聖人則湯武之會改命即革命也象曰改命之吉信志也志信于上下雖改命而人心不疑孚之有素也象傳謂革而當其悔乃亡是也

九五大人虎變未占有孚 象曰大人虎變其文炳也  
九五陽剛中正具大人之德居大人之位應天順人  
動則變變則化天下為之文明真如虎變文炳莫不  
快覩不待占筮以決之一皆孚信于變革之外矣故  
曰惟天下至誠為能化兌為虎變謂仲夏毛希而  
羊易至仲秋毛落更新而潤澤是亦離夏革為兌秋  
故以席變為大人之象且有夫畏民志之意虎變自  
仲夏故未占有孚象曰其文炳也虎變文章外見如  
離之明兌之澤而炳然莫掩天下孰不快覩而孚信  
之哉

三議革而後孚四有孚而後改五則未占有孚矣故  
重已日乃孚

上六君子豹變小人革面征凶居貞吉 象曰君子豹  
變其文蔚也小人革面順以從君也

上六居革之終黎民丕變莫不從其革矣君子豹變  
革其心而文章為之外著小人從君革其面而教令  
為之順行革而至此亦已成矣於此又欲變革無已  
不可也故以征則凶以居正則吉言革之已成患在  
不能守耳故勉之以居貞豹亦兌象豹以霧而變有  
上六陰柔之義兌說見于上有革面之象君子小人

皆已變革所以為革之終也虎變豹變即所謂虎革  
豹革象曰君子豹變其文蔚也豹文小而蔚虎文大  
而炳所以為君子大人之分小人革面順以從君也  
兌說也說見于面咸欣欣然有喜色而順從于外是  
百姓皆從上所革無梗化之民矣此又欲深求則  
革之過矣可見聖人以人治人不過求也

☲☱ 巽下  
離上

鼎元吉亨 彖曰鼎象也以木巽火亨飪也聖人亨以  
亨上帝而大亨以養聖賢巽而耳目聰明柔進而上行  
得中而應乎剛是以元亨

巽下離上鼎卦取巽木離火有烹飪之象以全卦觀  
之又有足腹耳鉉之象故為鼎鼎元吉亨六五虛中  
應九二之陽剛以其有巽順離明之德也蓋人能本  
柔中之德以應夫剛聃明順之德以健之用是乃大  
吉亨通之道 彖曰鼎象也法卦之象而為鼎鼎也以  
巽木入離火斯可以致烹飪之用則是聖人尚象制

冕豈為口腹之奉哉烹飪所需莫大乎賓祭二事享  
 上帝祭之大也養聖賢賓之大也烹上帝貴質養聖  
 賢貴豐故享以亨上帝大亨以養聖賢此鼎之義也  
 巽而耳目聰明此<sup>以</sup>一卦言之有內巽順而外聰明  
 之象謂巽離相資也柔進而上行得中而應乎剛此  
 以二五之言下應二剛謂剛柔相應也可見上  
 下兩幹相須為用猶木火相資為鼎巽以一之虛以  
 受之無所不亨無所不養元吉亨通不在是哉  
 初六鼎顛趾利出否得妾以其子無咎 象曰鼎顛趾  
 未悖也利出否以從貴也

初六陰柔在下於鼎為趾之象鼎而顛夫趾者利于  
傾出否惡以受夫餘將去故以從新也謂初六應上  
九四捨陰柔而從陽剛有捨故取新之義然豈一無  
所取哉巽為長女初居下而卑順于人為妾之象但  
六雖陰而初本陽位陰中藏陽有子之象故得妾以  
其子也妾從夫以有子母以子貴賤者變而為貴矣  
鼎顛趾而有出否之利人因妾有得子之慶故無咎  
鼎本三足初止二趾故象顛象曰鼎顛趾未悖也利  
出否以從貴也顛趾若于鼎為悖而出否正以取新  
從貴則亦未為悖矣從貴應四也否為賤新為貴亦



陽實而陰賤也

九二鼎有實我仇有疾不我能即吉 象曰鼎有實慎所之也我仇有疾終无尤也

九二以剛居中故為鼎有實之象二本五正應而密比于初則陰陽雖相親愛自二視之則若仇矣惟能以陽剛充實固守於中則仇雖有疾我之心無即我之便而鼎實可以大養所以吉也鼎初顛趾有仇之象鼎中有實則趾不復顛亦不我能即之義象曰鼎有實慎所之也以其充實之德往應六五之正所之可謂慎矣我仇有疾終无尤也慎所往也不為仇所

即何過尤之有

九三鼎耳革其行塞雉膏不食方兩虧悔終吉 象曰  
鼎耳革失其義也

九三居下卦之終宜自有耳然耳虛則行實則塞但  
上下二卦合為一鼎則三之耳革而其行塞矣惟上  
下合為一鼎故鼎中所烹之實乃雉膏文明之腴時  
未出鼎不見食于人由重剛大過而四又塞其行也  
然五為文明之主三有文明之腴終必相求而上下  
交焉如陰陽和而雨澤沛即虧失其悔而終吉矣三  
位當革上離為雉久陽卦陰故取兩象行塞不食為

四阻所也象曰鼎耳革必其義也三為下卦之上且  
有耳而耳革為于義不具失乎是以其行塞難膏不  
食必方兩而言

九四鼎折足覆公餗其行渥也 象曰覆公餗信如何  
也

九四以剛居柔與初柔相應然初趾方顛故有鼎折  
足之象餗即鼎實難膏之屬也折足剛公餗蓋覆而  
其行渥然九烹飪之中將賴以享上帝養聖賢者皆  
委諸地矣此所以凶也繫辭所謂德薄知小不勝其  
任是也初陰耦故象折足象曰覆公餗信何如也九

四信初六以相承然而信任匪人是以公餗覆而去  
矣此其所信者為何如哉可見覆在初而信之者四  
也非所信而信四蓋不能委其罪矣

初未實鼎故顛趾利出否四已鼎實故所足履公餗  
六五鼎黃耳金鉉利貞 象曰鼎黃耳中以為實也

六五以柔居剛虛中能受于鼎則為黃耳金鉉之象  
蓋鼎耳必得失鉉而後鼎實足以養人柔中必資夫  
剛而後中得不失乎正六五質雖柔而幹則剛故利  
貞可見受鉉以舉鼎者耳也黃耳以舉鼎實者鉉也  
六神體而中虛故為黃耳五陽位而堅實又為金鉉

是金鉉不必指九二亦不必指上九即本爻柔中有剛虛而得實是也象曰中有為實也六五不以鼎實為實而以中德為實剛柔相濟虛實合宜所以利貞上九鼎玉鉉大吉无不利 象曰玉鉉在上剛柔節也上九在一鼎之上鉉之象也陽居陰位剛而且溫故有玉鉉之象玉不畏火斯鼎有成功故大吉无不利上九乾體乾為玉玉鉉豈真以形用哉所以象其德也五重耳上重鉉故象各自其所重者而釋之象曰玉鉉在上剛柔節也以九居上剛柔中節且一鼎之用亦賴鉉以節宣之所以大吉且无不利也

震亨震來虩虩笑言啞啞震驚百里不喪匕鬯 象曰  
震亨震來虩虩恐致福也笑言啞啞後有則也震百里  
驚遠而惧迺也出可以守宗廟社稷以為祭主也

震下震上震卦取一陽動于二陰之下故為震震亨  
陽氣從下達上則陰氣閉而萬物發生人因雷震而  
恐懼修省一歸于理亦有震亨之義方震之動而來  
也虩虩然驚惶顧慮精神困困以儆省然後笑言啞  
啞然謹守常度精神亦與之而惧凝此惟戒謹恐懼  
心常存而不失故也是以雷之震也驚惧及乎百里

而時方主昏以事神明亦不至喪失也昏即五爻無  
喪有事之義故曰震亨兢兢即震之象謂震驚而內  
自省也嗟言謂震動有聲 象曰震亨震自有亨通  
之理方震之來也兢兢然反觀內省只此恐懼之心  
是即致福之道也人惟恐懼然後視聽言動一循乎  
理笑言啞啞皆中其節乃自然天則之不違也時乎  
震驚百里驚雖遠而惧則通彼乃卓然首出真精之  
常飲可以守宗廟社稷為祭祀之主而不喪失其已  
也烏此正所謂動亦定也出即說卦帝出乎震之謂  
祭主即序卦主器莫若長子之謂震為雷為長子故

其象如此夫存心常若聽雷之時而兢業不違精神  
凝聚則笑言皆法則之安詳幽獨即神明之對越由  
其中心有主是以萬變不移不有以出庶類而立人  
極乎

初九震來虩虩後笑言啞啞吉 象曰震來虩虩恐致  
福也笑言啞啞後有則也

初九一陽動于下處震動之初人之慎動在初為尤  
要也久象與彖辭同觀後與吉字可見先虩虩而後  
笑言啞啞先震恐而後安定何也人心戒惧則擬之  
後言樂然後笑皆當天則所以吉也蓋初為震主足



以當全卦之義其所以兢兢而致福咥咥而有則由陽剛初動真心始萌其震動恐懼之功一皆自然而然者耳

六二震來屬億喪其躋于九陵勿逐七日得 象曰震來屬乘剛也

六二雖居中得正而以陰柔乘初剛是震之來也極其迅殆不免于危懼矣斯時也反諸意念而自省焉中心之柔不足以勝乎陽剛之動若因震以失其所懷之寶故為億喪貝之象此心一動則氣即奔馳上衝為之不寧故為躋于九陵之象心既震動苟欲求

安其心則愈動矣惟恬然俱忘則心復其常也故又  
為勿逐七日得之象爻位陰柔故喪中正故得只是  
曰震而心動故氣浮惟安靜則心得其賤虛中自有  
寶藏之象億者意也見之不真守之不固不免暗事  
而度量也七與九皆陽數自一陽之動至七九而極  
矣震本陽卦六二純陰故得喪皆以七九陽數言之  
象曰震來厲乘剛也初剛震迅而二柔以則逼近  
雷威寧不危厲

六三震蘇蘇震行无青 象曰震蘇蘇位不當也

六三陰柔去初稍遠震而復蘇蘇有震蘇蘇之象然

三非陰柔本位莫若曰震懼而勉于行焉則精神散而復聚雖不能無過而能改其過亦免青之道也象曰位不當也柔居剛位故不得不行而去之以免乎青

征行皆震動之義三在內卦之終故曰行無青上在外卦之終故曰征吉

九四震遂泥 象曰震遂泥未光也

九四陽居陽位且以一陽陷于四陰之內故其震遂為陰所滯泥而不能達矣現爻位秉承皆陰有陽剛陷溺之象何必謂互體為坎耶象曰未光也雷本陽

明之氣陽泥于陰則剛氣不能奮發詩云嘒嘒其陰  
虺虺其雷謂之光大可乎人心之剛明每為所欲累  
故曰吾未見剛者

六五震往來屬億無喪有事 象曰震往來屬危行也  
其事在中大無喪也

六五以柔居剛得乎中道雖當震之時而初震既往  
矣四震又復來焉故亦為而屬焉反諸意念而度之  
神明在中不曰震屬而遂有所喪即舜之烈風雷雨  
弗迷是矣四震之泥于陰者已不若初震之迅急而  
五之陰居陽位又非若二之絀陰比也况往而又來

雖屬與二同而在二純陰故億喪貝五則陽位而陰  
中有陽故億无喪乎在中之所有也何也中心常有  
事乎戒惧之功雖危而實無所喪否則中心無主而  
無所事事欲其無喪也得乎象曰震往來厲危行也  
震動于往來之間其行也危矣然其事在中大无喪  
也一中之允執者必有事焉又何有于大喪乎  
陽本大也震本陽卦雖六居乎五而五本陽位在中  
夫何喪耶

上六震索索視矍矍征凶震不于其躬于其鄰无咎婚  
媾有言 象曰震索索中未得也雖凶无咎畏鄰戒也

上六陰柔居震之極屣震不已故為震索索之象在  
上為視故為視矍矍之象凡人震驚不寧則目之視  
視周章不定况處卦中于此又欲征行不亦凶乎夫  
震之來必先五而後上而四震遂泥亦止能及五不  
能及乎上也。不于其躬于其鄰則豫圖可以免咎但  
陰雖受震于陽而陰陽本有婚媾之義上六既震不  
于其躬若目同體相親遂與之婚媾亦不免于有言  
總謂震極不寧莫若先事自備震有聲故象有言象  
曰震索索中未得也中心恐懼不能自得故其形諸  
外者有如此耳雖凶無咎畏隣戒也。曰鄰以為戒既

得乎先事之圖則震終不及其身又何咎  
卦爻兢兢啞啞蘇蘇索索雙雙昏

兼山艮

艮上  
艮下

艮其背不獲其身行其庭不見其人无咎 象曰艮止也時止則止時行則行動靜不失其時其道光明艮其止止其所也上下敵應不相與也是以不獲其身行其庭不見其人無咎也

艮上艮下艮卦取一陽止于二陰之上故為艮艮自人身觀之一陽隆然在上者背之象也觀卦畫一奇在上者背之象觀上下兩卦亦有相背之象艮其背既止乎一定之所是以不獲其身于已無所與也行其庭不見其人于人無所與也人我无所交涉故无



咎若謂艮背則忘物忘我為止之極焉于易當為元亨利貞為吉不無利何為僅無咎也觀彖傳自見又之一身耳目止則廢視聽手足止則廢行持惟背止于身不相運用故云不獲身背後一無所見故云不見人皆實象也 彖曰艮止也艮之義也非謂一于止而已也時乎當止則止時乎當行則行或行或止動靜不失其時則其道光明而聖學所謂止至善者此也正以道本無方所也若艮卦所謂艮其止則止其所以既有方所可居故初與四二與五三與上本當相應之位乃陰與陰相敵陽與陽相敵上下相敵

實不相應漠然兩無所與截然若不相干夫固一于  
止而不知時行者也是以不獲其身行其庭不見其  
人無咎也是世有以靜修為學是內非外者良近之  
初六艮其趾無咎利永貞 象曰艮其趾未失正也  
初六陰柔在下不宜動也而趾于一身為最下故為  
艮趾之象趾象有動之初也能止于其初則不行矣  
故無咎豈徒止于其初而已哉必常永貞正之為利  
也所以象曰未失正也一陽止于終者艮之正也初  
亦止躡能止于其初而不至妄動尚未失正故以永  
貞勉之不止則不正可知矣

六二艮其腓不拯其隨其心不快 象曰不拯其隨未  
退聽也

六二陰柔居下卦之中腓亦柔軟在下躄之初故有  
艮其腓之象夫腓之柔不得不隨限而動也二不能  
拯三且隨限而不動則動止由限不由腓其心寧能  
以自快哉何也三為艮主而陽爻過不中不正二  
雖中正而力不能止未免以陰隨陽不能拯救其剛  
之過矣是止不由己安能脫然无係所以其心不快  
可見欲自快于心者時止則止時行則行動靜不失  
其時而无係累斯可也象曰不拯其隨未退聽也能

退聽于下者必不進以隨人雖不能極亦能自止也  
二不能極三而且以隨之矣謂之退聽可乎

九三艮其限列其夤屬薰心 象曰艮其限危薰心也  
九三過剛不中止于下卦之象夫固上下之限也但  
一陽陷于四陰之內則亦止非所當止者既不能上  
又不能下未免分列判隔而勢甚憂危則陽氣炎上  
適以薰灼而不寧矣故為艮其限列其夤屬薰心之  
象即如人之一身必榮衛流通斯心自寧泰若止于  
腰膂上下限隔之間則營衛分列其氣鬱結適以薰  
蒸其心何能以自舒也可見止無定所不可限于一

隔若有定限則必不免乎厲薰心之病九三一奇橫  
一卦之中有限之象一陽間隔四陰有列黃之象象  
曰艮其限危薰心也一身皆元陽流暢而止于其限  
固不免夫薰心之危萬變皆元善之周流而執一不  
通又安得乎正心之道然則心本無限而限其可止  
哉

二雖中正而爻位皆陰力不足以拯三故心不快三  
不中而爻位皆陽力足以自止故艮其限列黃危薰心  
是二不及而三大過于此可以觀止矣况止必由心  
故二三皆以心言

六四艮其身無咎 象曰艮其身止諸躬也

六四以陰居陰其才柔順能自止其身則不為物廷  
不為欲奪故無咎夫四居卦體之半不言心而言身  
者身即心之郭郭且爻位陰柔故為身之象大凡事  
不可為使韜才斂跡皆艮身之象但止能善其一身  
自為則得矣天下之所當止也果如斯而已乎象曰  
止諸躬也是獨善不能兼善可知矣以萬物為一體  
天下為一身者觀象玩辭得無有所做乎

四象身乃人生所自始處故又以躬象之不可息也  
六五艮其輔言有序悔亡 象曰艮其輔以中正也

六五柔中在人身當頤輔之處故為艮其輔之象艮  
輔則知所謹而言不妄發苟一有所言必如絲綸之  
有序而不亂矣妄言之悔不其妄矣乎虛中有頤輔  
之象柔中有剛其言必訥有艮輔之象象曰以中正  
也柔中得正所以止其輔者非止之不言也本之以  
中正之德斯有德者必言有矣輔一也成說艮止故  
其象異

四艮身則無妄動五艮輔則無妄言

上九敦艮吉 象曰敦艮之吉以原終也

上九以陽剛居艮止之極剛從為實重厚不死則一

身有所之止不足以象之殆無所不止而其止也道  
尊德重極其敦厚者矣此謂止至善安汝止也所以  
為吉象曰以厚終也止本艮之終也敦厚在上則一  
身趾腓夤輔莫不厚其終矣何吉如之可見上九為  
艮之主爻山以絕頂為終地上高堆曰敦故敦艮吉  
陽剛止于上九在下者孰得而偏係之哉噫知上九  
一爻以無定所獲吉則艮背無咎可默會矣



䷴  
巽上  
艮下

漸女歸吉利貞 象曰漸之進也女歸吉也進得位往  
有功也進以正可以正邦也其位剛得中也止而巽動  
不窮也

艮下巽上漸卦取艮男巽女男止在內而不遽往女  
巽將入而有所待其漸進有序故為漸夫男女萬化  
之先女歸人道之始女謂嫁曰婦婚禮備而貞女始  
行故女歸以漸吉之道也然卦以內為主也進婦以  
漸而其位亦必利乎正焉長女歸少男故曰女歸卦  
象九五位中而得正故曰利貞 象曰漸之進不燥

進也女婦如是則吉也女婦漸進則吉何也剛柔上下惟進之以漸則得乎正位而往有功此所以女歸吉也况進以正則可以正邦而成化矣進可不正乎然得位正邦果何位也九五陽而得中進居尊位所正邦有功者此也故卦辭曰利貞可見此卦雖以女歸明漸進之義其實重九五陽剛得中况其德艮止于內而巽以行之欲進欲不遽進是以隨所動而時行時止各以其漸變化進退其動不窮此漸之所以吉歟

漸惟進處最要緊不漸則欲速不達故曰漸之進也

觀下面三進字一往字一動字無非戒人妄動驟進  
也不窮即是正邦正邦即是有功文法相承非各一  
義也而剛中巽止其漸之樞乎

初六鴻漸于干小子厲有言无咎 象曰小子之利義  
无咎也

初六陰柔在下為漸進之初而干則水涸之最下者  
故為鴻漸于干之象鴻宿水濱大者居中小者圍繞  
巡傲于外不亦危乎有傲則鳴不有言乎知危可以  
避患故无咎初六陰居陽位則居不安故危惟其危  
也故不免有言艮少男故云小子象曰義無咎也以

義揆之寧有知危而陷于過者也

六二鴻漸于磐飲食衎衎吉 象曰飲食衎衎不素飽也

六二陰柔得中而漸以進之磐則稍上于干矣故為鴻漸于磐之象位既中正則食亦安詳而飲食衎衎吉可知矣凡禽鳥之食悅而食仰而四顧驚即飛而去之于磐則安而食飲亦自如也柔中進得所安是以無忝厥位艮為小石故象磐象曰不素飽也曠其位者必有素餐之耻二以中正在位雖萬鍾不以為泰豈空食云乎哉

九三鴻漸于陸夫征不復婦孕不育凶利禦寇象曰  
夫征不復離群醜也婦孕不育失其道也利用禦寇順  
相保也

九三陽居下卦之上是由盤以漸進于陸而不安矣  
故為鴻漸于陸之象夫三陽既以大過又與四陰相  
比是三四猶夫婦之親實非正應象夫征不復而不  
能自有其室矣且不正苟合則婦孕亦不取育此其  
所以凶乎雖然三之剛誠過矣然剛亦得正為以之  
禦寇則利以之求配則非耳艮為徑路有陸之象此  
卦九三原自四來六四原自三往故三剛不安于此

則凶夫指三婦指四寇即四也鴻群不亂止于相保  
亦有禦寇之象象曰夫征不復離群醜也離下二陰  
之群類也婦孕不育失其道也非其配耦以孕不育失  
其孕嗣之道也利用禦寇順相保也和順以相保斯  
其善于用剛者乎可見一于剛則凶善用剛則利三  
剛利于止不利于進易之所以變動不居也

六四鴻漸于木或得其桷无咎 象曰或得其桷順以  
巽也

六四陰柔離下而上則其位已高猶山之木也故為  
鴻漸于木之象雖鴻不木栖而陰居陰位且在上卦

之下或者猶得夫平柯之稱焉高而不危故為巽  
為木象曰順以巽也陰柔則順且為巽體不失柔正  
之道也

此爻處陽剛之上故于木而不安然陰柔巽順故得  
稱而無咎亦居為地而得夫善處之道者

九五鴻漸于陵婦三歲不孕終莫之勝吉 象曰終莫  
之勝吉得所願也

九五剛居尊位猶高地之陵也故為鴻漸于陵之象  
然二五本剛柔正應而為三所間是以婦三歲不孕  
矣但剛柔中正久之夫婦必相和好彼之間以私情

者終莫之勝所以吉也巽為高有陵之象且居艮上  
與二相隔三爻故為三歲之象象曰莫之勝吉得所  
頌也可見不正者終不足以勝乎正也

五與二應乃夫婦之正配故吉三與四比乃夫婦之  
邪匹故凶

上九鴻漸于陸其羽可用為儀吉 象曰其羽可用為  
儀吉不可亂也

上九居漸進之極亦為鴻漸于陸之象夫陸一也在  
內卦之上而艮有所止雖高未至于極高也在外卦  
之上則乘巽風以極其高矣非雲路如何是以鴻屬



于飛肅肅其羽仰而觀之殆有可用為表儀者鴻漸  
進而上故高飛而吉象曰不可亂也鴻鴈排雲而飛  
先後次序翼翼乎其不可亂此所以可用為儀也然  
則人能鴻飛于天繒繳莫得以加之其出處進退不  
可得而亂也真為天下之儀刑所關矣

下陸艮山取止儀上六巽風取高義所以天衢雲路  
俱陸之義也何必改陸作遠

漸陸久昏取象于鴻鴻之往來有時進退有序漸之  
象也故又為隨陽之儀而女不更嫁鴻不再耦親迎  
之禮必奠鴈其即女歸利貞之謂乎



兌下  
震上

歸妹征凶无攸利 彖曰歸妹天地之大義也天地不  
交而萬物不興歸妹人之終始也說以動所歸妹也征  
凶位不當也无攸利柔乘剛也

兌下震上歸妹卦取震男上兌女下少女為妹長男  
兄也兄嫁妹故為歸妹此卦之名也夫男女之相從  
正則尅是卦剛柔雜居不以正而征故征凶夫婦之  
相與順則利諸爻剛柔承乘不以順而從故無攸利  
况以說而動恣情徇欲動不宜動說不宜說故既曰  
征凶又曰無攸利垂戒深矣 彖曰歸妹天地之大

義也何也天地不交則萬物不興義何如其大乎人亦小天地也歸妹女歸乎男人道所以成始成終者在是非人之終始乎歸妹之有關於天地人者如此總釋卦之名義也然卦辭謂之凶謂之不利者安在以卦德言之免說震動說動皆以情勝所以不重震男而重兌女兌在內為卦主故謂之歸妹所歸由乎妹也征凶位不當者下兌陰在陽位上震陽在陰位是也无攸利柔柔剛也者兌在三柔柔初二之剛震上五柔四剛是也惟其說以動則三四之陰陽失位既不以正三五上以柔柔剛又皆不順此所以凶所以

无攸利歟

初九歸妹以娣跛能履征吉 象曰歸妹以娣以恒也  
跛能履吉相承也

初九陽剛在下得正陽剛為婦人賢貞之德而婦在  
下位卑者為娣初九娣之賢正者也上無正應則娣  
之卑而賢者何所能為不遇相承相助以行之如跛  
之能履而已守正以征進吉孰加焉初在下位為娣  
之象娣僅能承助於君不能大有所行且一卦各爻  
失位初獨履正故有跛能履之象帝妹之嫁必有媵  
娣亦是常道故象曰歸妹以娣以恒也跛能履吉相

承也彼此相承雖跛亦能履故吉

震為長子兌為少女故卦名歸妹兄嫁妹也三為兌之本久而初處三之下故為婦之象三以柔居剛位故曰以順反歸以婦是反下以初也使初三易位則成恒矣所以象曰歸妹以婦以恒也相承之義不亦明乎

九二眇能視利幽人之貞 象曰利幽人之貞未變常也

九二本為女德之中以剛而上視五柔故有眇能視之象然亦何傷于在中之陽明哉况陽剛在中乃幽

閑雅素之人也恬然自守一毫無慕于外而得其道  
之正矣故利做人之貞二居兌中處于三下亦象幽  
人象曰未變常也常即恒義惟初三易位 恒已變  
為婦妹而九二在中曾何變乎不變常便是幽之義  
履卦亦下兌九二象幽人六三象眈眈跛能履丈  
位雖殊因兌取義則同總由兌為毀折柔說以承乾  
震之剛故有病也

六三婦妹以須反婦以娣 象曰婦妹以須未當也

六三陰柔居下卦之上為兌說之主不中不正无女  
德而為女之賤者也須賤女也婦妹以須而獲寵于

上未免以陰而先陽以賤而先貴矣故必反歸于下  
而以初之婦為反歸有反已歸正之義按天官書以  
織女三星為貴女須女四星為賤女象曰歸妹以須  
未當也以六居三柔乘賤剛凌貴皆未當也反歸以  
婦則以恒矣歸妹兌體說而不正故不取六三之柔  
而于初二之剛猶有取焉

九四歸妹愆期遲歸有時 象曰愆期之志有待而行  
也

九四陽剛居上體之下且無正應亦賢女不妄從人  
者也然陽震于陰其震動也必愆其期而以剛履柔

雖遲歸也自有其時夫四為震之主爻曰愆期曰遲  
歸由其失位無應不得不待其時也象曰愆期之志  
有時而行也志在時時而行期謂動必以禮不以說  
而妄動矣可見卦以婦妹名雖震陽亦義重婦妹  
六五帝乙婦妹其居之袂不如其娣之袂良月幾望吉  
象曰帝乙婦妹不如其娣之袂良也其位在中以貴行  
也

六五柔居尊位與九二正應尊而謙降故為帝乙婦  
妹之象但其君之袂不如其娣之袂良君即五娣即  
初也然以柔中應剛中猶幾望之月日光無所不受



將盈未盈而陰柔可以配合陽剛必有宜家之吉矣  
觀泰五亦曰帝乙歸妹以祉元吉其有女德可知也  
袂為衣袖有妹娣連袂之意其良在袂亦有娣不如  
君貴之意象曰帝乙歸妹不如其嫁之袂良也可見  
君即指娣妹謂五柔不如初之剛也然五之吉者何  
其位在中以貴行也位中而貴則娣袂雖良終在下  
位而五以貴行此其此以吉歟行本于震動連袂而  
行出嫁之謂也

古王姬出嫁必有娣媵此卦有君之娣謂帝乙以兄  
嫁妹其信然歟

上六女承筐無實士刲羊無血無攸利象曰六上無實承虛筐也

上六陰柔與三陰不相為應故不曰夫婦而各以士女稱之承筐刲牲所以奉祭祀也惟陰虛不應故承筐無實刲羊無血則宗廟不亨不能成其婦妹之終矣何所攸利哉震有筐象兌有羊象象曰上六無實承虛筐也六陰本虛虛筐則不可以祭是謂德女無終也不言士者卦為歸妹而發曰其無終故不以歸妹許之

豐亨王假之勿憂宜日中 象曰豐大也明以動故豐  
王假之尚大也勿憂宜日中宜照天下也日中則昃月  
盈則食天地盈虛與時消息而況于人乎

况于鬼神乎

離下震上豐卦取震動離明明無不照動無不行極  
其盛大故為豐豐亨謂盛大自無所不亨然惟王者  
為能履此盛大豐盈之極也但當此盛大之時保之  
最難固不能以無憂也亦何事於後憂為哉明為動  
本惟中則明宜如日之方中使其照無不及斯可永

保夫豐亨矣。豐大之極，常人以為喜，聖人以為憂。勿  
憂者，非無憂也。于此有道，可勿憂也。震體居上，既曰  
勿憂，離艸中虛，又曰日中明動相資，故能大。乃知世  
之偽盛德者，必知行合一，樹大勳者，必才識俱優。豐  
之道也。辰曰：豐大也。豐之義也。以卦德言之，離明  
震動，明動相資，所以能成豐大也。王假之尚也。爾  
雅曰：假大也。高大即假之謂也。勿憂，宜日中，宜照天  
下也。王者所尚，皆大明大焉之體。但過盛亦若有可  
憂者，其實何事于憂。恆為哉。致豐者，保豐之道也。  
宜日中之方，中照臨乎四海之廣，則常明常動無所

不宜此所以亨也若夫盛衰相為倚伏日中則昃月  
盈則食天地盈虛與時消息雖明而人幽而鬼神俱  
不能違也然則知日昃之當戒不可以知日中之為  
宜乎持盈保豐之道端有不容已者

初九遇其配主雖句無咎往有尚 象曰雖句無咎遇  
句昃也

初九陽剛而二則離之主爻也離本陰麗乎陽初陽  
二陰相麗相配故有遇其配主之象然一卦六為爻  
六句自初至二為一句句即離日之象句而相遇日  
中則明何咎之有且初之二為已之配主必往而從

之則豐大于此乎存矣不亦行有可嘉尚乎象曰雖  
句無咎過句災也過句則過震矣非災而何

二為離之主爻初陽二陰相合成離故曰配主四為  
震之主爻離明震動相合成豐故曰夷主離震本相  
等夷也

六二豐其蔀日中見斗往得疑疾有孚發若吉 象曰  
有孚發若信以發志也

六二離明中正明之極盛者也然離上有震正應昏  
暗當晝而昏適以大其障蔽而已故為豐其蔀日中  
見斗之象斗不晝見而日中見之則白晝為昏夜矣

蓋二為離主而震來蔽之其豈也豈其却也其見也  
見夫斗也不見日而斗見<sub>逆</sub>甚見之妄也于此往  
從六五之陰暗得無疑乎徒致疾而已矣但二本虛  
明惟有孚發若積誠意以感通之則釋其疑開其障  
蔽去其妄見而吉矣離處震下有掩覆之象六五震  
而以陰從陰有疑疾之象離明有見之象暗中  
見其明不過見斗之明耳非真明也此又<sub>逆</sub>意為象  
者也日中見斗妄見也安得不疑開發疑見惟在誠  
信而已所以象曰有孚發若信以發志也積誠信以  
開發其心志則却于是乎發矣誠則明也孚與疑相

反發與蔽相反外豐蔽故有疑內有孚則發若故吉  
豐者盛大之稱在一卦雖曰宜日中而二三四爻皆  
曰日中以明動過盛則不免有日中見斗見沫之異  
故曰幽不明也明之過而反為不明此處豐之所以  
難歟

九三豐其沛日中見沫折其右肱无咎 象曰豐其沛  
不可大事也折其右肱終不可用也

九三陽明居下卦之上亦若足以為有者然雖處震  
下與上六陰極相應適以豐大霖雨而滂沛其勢為  
耳故為豐其沛日中見沫之象沫者小星也晝而見



沫昏愈甚見愈小也蓋蔽愈大則見愈小且密比四  
震離為震掩不足有為又有折其右肱之象夫左右  
手相藉為用而折肱在震則咎不在三矣蓋三本以  
陽居陽自處未失其正故無咎象曰豐其沛不可大  
事也既以蔽其明而識小不足以見大以折其右肱  
終不可用也石肱一折則左臂不能獨運將何所指  
手以大其用哉

九四豐其蔀日中見斗過其夷主吉 象曰豐其蔀位  
不當也日中見斗幽不明也過其夷主吉行也

九四陽剛動體足以致豐大矣但以陽居陰本位震

動又宓比五在兩爻之陰亦為豐其蔀日中見斗之象然二四本同功異位亦有過其夷主之象所以過夷主吉者何也震動則行而離明不為所蔽故吉也四為震主二為震主二卦本相等夷震離相合成豐故曰過象曰位不當九不宜居四也幽不明惟蔽重則幽故不明也是震之動適以蔽其離之明故不徒曰不明而曰幽不明為過其夷主吉行也震動則行此所以過夷主而吉也夫豐蔀見斗之象四與二同小象詳發于此可見豐其蔀者震也四為震之主而四之蔀則已自致之以陽而居陰也

六五來章有慶譽吉 象曰六五之吉有慶也

六二柔中居尊當豐之大時而有離明之德何章美也五能已虛以來之不自滿假深得處豐之道而福慶駢集名譽著聞故吉蓋五出四震之上不為所掩矣所以在二曰往來以遇乎震在五曰來實以資其明且二本離中文明故象來章象曰六五之吉有慶也兼天下之明總天下之動慶莫有大于此者由五能虛已以來之耳是慶集于虛也五雖不言豐其所以致天下豐大之慶者孰加焉

上六豐其屋節其家闐其戶闐其無人三歲不覿凶

象曰豐其屋天際翔也聞其戶閉其無人自藏也

上六柔暗居豐之極位已高矣又亢以自居求動不  
已用明不止祇豐大其屋以自障蔽其家不特拒人  
千里之外也聞其戶閉其無人三歲不覩而家之戶  
內寂然無人跡矣不其凶乎上六日昃故有豐屋節  
家之象動極必靜亦有聞其無人之象、曰豐其屋  
天際翔也凡人處豐富莫不杜處其居室如鸞飛鳥  
革蔽覆天日而障亦已大矣聞其戶閉其無人自藏  
也豐大之極障蔽之深自視太尊人莫敢近豈人之  
絕彼哉彼自絕乎而家亦莫得而見之美此爻形容

人處晝時最為親切令人可畏意豈特處富貴豐大  
之極者有此凶哉人以學識自高而大其障蔽者其  
初之自視亦足翔翔天表蔽身富美之室其終至於  
人莫敢親而猶自以為人莫及者何以異此

二三四尚在日中故蔽于震五則正與離日相應故  
吉上過中故凶

此卦以離明為主故曰宜日中九節也沛也皆蔽明  
者曰孚曰發曰采章曰夷曰配皆明之助也故吉各  
爻陽居陽位又不應陰為美而五則出乎震之上也



艮下  
離上

旅小亨旅貞吉 象曰旅小亨柔得中乎外而順乎剛  
 止而麗乎明是以小亨旅貞吉也旅之時義大矣哉  
 艮下離上旅卦取山止于下火炎于上離其所止而  
 不處故為旅旅本不能大通旅亨亨之小也陰本小  
 也事有大小道無加損處旅之時惟正則吉 象曰  
 旅小亨何為而亨之小也離為外卦也故謂柔得中  
 乎外而順乎則者何也以處旅之道宜于用之六居  
 外卦之五位而麗乎上下之剛是觀之卦體可見其  
 柔中以順剛矣又謂止而麗乎明者何也以用柔之

道內固不可以不止外又不可以不明下艮止上離  
明是觀之卦德可見用柔又止而麗乎明矣夫柔順  
乎剛既以得中止麗乎明一出于正柔中而正時措  
皆宜必如此然後可以小亨然後可以貞吉也旅之  
時內不失已外不失人以亨以正義之與比旅之時  
義何其大哉

柔得中乎外即旅之象止而麗乎明信乎離為主也  
初六旅瑣瑣斯其所取災 象曰旅瑣瑣志窮災也  
六二陰柔在下處旅之時瑣屑猥鄙不能自震故為  
旅瑣瑣之象然寤而失義則不能正已凡在外者皆

得而奪之斯其所取災矣象曰志窮災也境有順逆  
志無窮違旅特其過耳匹夫不可奪志若此志一奪  
則困窮拂鬱何莫非其所自取乎可見遇窮志亨旅  
安得而災之也

六二旅即次懷其資得童僕貞 象曰得童僕貞終無  
尤也

六二以柔順中正而處旅之時陰位止體既有即次  
之安柔兵在中且承陽實又有懷資之利所乘者又  
初柔之瑣瑣得童僕以給使令凡此皆六二處旅之  
正道也二陰柔本位故為即次之象即次暫止也童



僕指初艮為小子之象象曰得童僕貞終無尤也夫  
在旅之所與處者惟童僕耳既得童僕然後即次懷  
資皆無所失旅道之正莫踰于此終何尤哉

九三旅焚其次喪其童僕貞厲象曰旅焚其次亦以  
傷矣以旅與下其義喪也

九三重剛不中居艮之上既以亢矣其所密比又有  
離火在上故為旅焚其次之象然剛之過者多暴以  
使下而去初之童僕亦遠矣故又為喪其童僕之象  
如此則雖剛得其正而承上使下皆不宜乃危厲之  
道也象曰旅焚其次亦以傷矣既能不獲上以安其

身也以旅與下其義喪者在旅又剛躁以與下而以  
義揆之童僕為必喪也既傷于上又喪于下其危也  
宜哉

九三剛居剛位象本不喪而處旅遇剛則于義為必  
喪焉各象象中義字例此

九四旅于處得其資斧我心不快 象曰旅于處未當位  
也得其資斧心未快也

九四剛居柔位處上卦之下雖非安居而在旅寓之  
時亦既處之矣且既得其資以自給又得其斧以自  
防宜若快于其心矣然久處不歸終匪陽之正位况

上無陽剛之與下惟陰柔之應我之心其能以快然  
哉我即四自我也象曰旅于處未當位也得其資斧  
心未快也四句宜作一氣說陰位非陽剛所安縱得  
資斧而不得位以行其志其能快足于中以自安于  
旅哉况旅以行為義安處非旅之亨也

六五射雉一矢亡終以譽命 象曰終以譽命上違也  
六五柔中離明而失其剛矣故有射雉一矢亡之象  
夫射之所嚮在文明之雉謂六自三而進居于五以  
成離射雉也九自五下居于三一矢亡也始若得明  
失剛然旅以柔中為尚以承上為順循此而終則人

心得而譽聞宣著天心順而申命用休皆于此乎在  
是爻雖不言旅而射雉即出旅之義九卦辭旅小亨  
旅貞吉象傳柔得中乎外而順乎剛者惟此爻得之  
離為雉為戈兵象陽畫象曰終不譽命也遠也終  
與上皆指上爻譽命皆本乎上惟處旅有道則可以  
獲上而譽命固其所必然者况離卦本柔中處剛若  
虛已以待命于上所以得處旅之善也

一卦六爻各有所重此卦本以三五交錯成旅然旅  
道尚柔不尚剛且六五為卦之主爻故終以譽命而  
三則過于剛也各爻皆當看其所重何在

上九鳥焚其巢旅人先笑後號咷喪牛于易凶 象曰  
以旅在上其義焚也喪牛于易終莫之聞也

上九剛而不中處離火之上乃羈旅之極居高用剛  
者也剛不載則自焚其次矣故為鳥焚其巢之象然  
未焚之先居高若可自適故先笑焚次則身失所安  
而號咷且上本柔位而九剛居上自失其柔順之道  
故又為喪牛于易之象要亦不能用柔以至于此得  
非自致其凶乎在一卦之上故象為巢離火之極故  
象本上本柔位而剛來居之故象喪牛易場也象曰  
以旅在上其義焚也離上過亢于義則必焚矣喪牛

于易終莫之聞也高亢自恃終莫聞其過剛燥動之  
失此所以凶可見九三以剛過而義當喪上九以過  
剛而義當焚旅之有取于柔中順剛也益信矣故剛  
居上位為屯凶

大壯六五柔居剛位故曰喪羊于易旅上九剛居柔  
位故曰喪牛于易合而觀之其義自見

隨風巽

巽下  
巽上

巽小亨利有攸往利見大人 彖曰重巽以申命剛巽  
乎中正而志行柔皆順乎剛是以小亨利有攸往利見  
大人

巽下巽上巽卦取一義伏于二陽之下以卑巽而下  
乎陽剛故為巽巽小亨陰為卦主陰本小也一陰從  
下巽以文之其所通者小也故有小亨之象以此巽  
順而嚮往則可以通達故為利有攸往之象以此  
巽順而入見則可以親盛德故為利見大人之象蓋  
以陰從陽皆有所利也 彖曰重巽以申命謂上下

二卦皆巽故曰重曰申九發號施令必重復而丁寧  
之也卦體陰陽雖不交而陰皆承陽有命令下入之  
象况巽本善入而上之用巽一順乎人心以命令之  
既命之于前復申命之于後斯入之深矣剛巽乎中  
正而志行指二五也上行者陽之志二五皆以中正  
之剛處初四之上故其志行也柔皆順乎剛指初四  
也順乎陽剛之上正以成巽體斯陰柔得亨通也是  
以小亨利有攸往利見大人繫承上言攸往即志行  
大人即中正之剛也小亨利往利見皆指初四之柔  
以為成巽之主然其所以亨而利者非上從二五陽



剛之中正其能然哉要之柔順乎陽剛剛巽乎中正此巽之所以為巽歟

兩卦重巽以甲命故小亨二五剛巽乎中正而志行故利有攸往初四柔皆順乎剛故利見大人依此分貼亦是

初六進退利武人之貞 象曰進退志疑也利武人之貞志治也

初六陰柔在下為巽之主過于卑巽者也初本欲進而柔巽之人每安于怯退或進或退無所適從故為進退之象然豈一無所利哉惟果斷之武人用之

出于正則為宜也。巽為進退，為不果，其究為躁卦，且柔據剛位，故利武人。然苟非武人之正道，不利。又可知矣。象曰：進退志疑也。利武人之貞，志治也。初六之巽一也，用之進退而過于怯懦者，其志疑用之武人而濟以謙巽者，其志治，願用之何如耳。

九二巽在床下，用史巫紛若，無吉咎。象曰：紛若之吉，得中也。

九二剛居柔位，與九五兩剛不能相入，則不獲乎上，而巽以處之，過于卑巽者也。禮雖當巽，而過則非禮，故為巽于牀下之象。是道也，非違道也，惟以此用乎。

祝史巫覡以道達誠意于神明則其禮繁辭悉雖至  
紛若丁寧煩復要亦謙卑以事乎神而不厭耳所以  
吉以無咎此文體陰故也人臣誠意積中而有人道  
違于君側則禮雖過而事亦有宜然者故以吉无咎  
許之巽為木且卦蓋有休之象吉古之尊者生于牀早  
者跪拜于牀下二以陽居陰巽之過也故為牀下之  
巽象曰紛若之吉得中也外雖紛若之不一中則一  
誠以求通雖用史巫亦巽而不為過矣為誠不足乎  
中而過于卑巽奚可哉

九三類巽吝 象曰類巽之吝志窮也

九三過剛不中居下體之上本非能巽者特處巽之  
時亦敬謹巽以相親而頻失頻巽未免前倨後恭故  
吝蓋巽而至于頻則不巽之時亦多矣三當上下重  
巽之間有頻巽之象象曰志寤也重剛之志多驕情  
不恭特時勢不得不然故勉焉為巽以取容實非其  
志也屢失而巽則其志已寤盡露本真矣非剛不宜  
巽也巽與過剛相反故三與上之巽皆以過剛而寤  
六四悔亡田獲三品 象曰田獲三品有功也

六四柔巽乘承俱剛宜有悔矣但柔得正位處上之  
下故得悔亡時乎田獵乃獲乎上殺中殺下殺之三

品即小雅車攻章大庖不盈每等取十有異而不多  
取之意三品即下三爻之象貴賤之等也象曰有功  
也田而獲禽之多則以備乾豆奉賓容充居庖皆其  
功矣惟其柔巽得正所以有巽之功也觀初與四皆  
巽之主爻初利武人四田有獲可見巽本柔道而過  
于柔烏不可也要在時措之耳雖然巽而止利武人  
有功田獵豈巽之進善者哉

九五貞吉悔亡無初有終先庚三日後庚三日吉 象  
曰九五之吉位正中也

九五陽居尊位所謂重巽申命剛巽乎中正而志行

是也。陽剛中正是之謂貞，惟貞故吉，故悔亡，故無不利。然則以此中正之德施之，變更之間，豈剛斷自是而遽然變更之哉？其初必有命令，與民商確，其更始之宜，至于終而民皆以為可更，然後更之一，定不易上之巽，以待民如此，所以無初有終也。無初有終之象，何如十干以甲為初，以癸為終，先庚三日，丁戊己則无甲，無甲則無初矣。後庚三日，辛壬癸有癸，不有終乎？三句當與蠱卦先甲三日，後甲三日終則有始，參看蠱之所以為蠱，巽之所以為巽，即此明矣。巽一陰初變乎陽，有庚之義，三亦為无初有終之

象象曰九五之吉位正中也陽剛位乎正中所以貞  
吉悔亡無不利也所以先庚三日後庚三日重巽申  
命盡乎正申之道也更革事宜莫善乎巽五巽之主  
也故特言之噫上之巽以順人心也一至于此而下  
其有不柔順乎剛者哉

甲者甲折也物之始也一陽生于子至寅之三陽而  
物始出萌又歷三陽而後滿蓋為亂之終治之始故  
甲取始義庚者更革也物之變也一陰生于午至申  
之三陰而物始變巽乃陰之始變乎陽也故庚取變  
義若止云先甲為辛後甲為丁先庚為丁後庚為癸

而反遺其終則存始无初有終之訓失聖人之旨不  
益遠哉

上九巽在牀下喪其資斧貞凶 象曰巽在牀下上窮  
也喪其資斧正乎凶斷凶也

上九位極高，高而過于卑，巽陽剝處，非所據，故為巽  
於牀下之象。將以保其富貴適以喪其資用之利，將  
以固其權勢適以喪其斧斷之則是極巽亦道之正  
也。但過于巽而不免有所喪，雖正而凶矣。象曰上窮  
也，處上過巽則巽道窮矣。然執禮過卑而不可謂不  
正也。上窮至于喪失，所有可以為正乎，故不免于凶。



四句一氣直下可見巽美德也宜乎剛柔得中而過  
巽則非

巽本以陰柔成卦二五皆居柔位過巽不安故皆取  
牀下之象二中故吉上窮故凶

麗澤兌

三三  
兌上  
兌下

兌亨利貞 彖曰兌說也剛中而柔外說以利貞是以  
順乎天而應乎人說以先民民忘其勞說以犯難民忘  
其死說之大民勸矣哉

兌下兌上兌卦取陽下于陰、陽和說又陰在陽上  
喜見乎外故為兌兌亨人心相說亨通之道也觀之  
卦象以一陽而下一陰故相說、相則亨矣陽剛中正  
而和說外見故利貞且相說之情故流於不正而所  
利在貞亦因以為戒云耳 彖曰兌說也此兌之義  
也以卦體言之剛中而柔外剛中指二五柔外指三

與上也惟則介存乎中柔順見乎外此其說也非邪  
媚以相徇也由中達外無二毫違道干譽之私所說  
一出于正而利乎貞也如是則順天理應人心和而  
不流為能與天人合矣說而至于順天應人則無所  
不說故其于民也佚之說也勞之亦說也生之說也  
殺之亦說也惟無所勞則已勞則說以先之民忘其  
勞惟無患難則已難則說以犯之民忘其死說而至  
於忘勞忘死此所以為說道之大而民心自勸皞  
乎不戒以孚異乎驩虞之說也說之亨也有如此然  
則兌說之大其大于則中柔外之正道乎要之惟則

中故說之正惟利正故說之大天人皆說此兌之所  
以為兌也

初九和兌吉 象曰和兌之吉行未疑也

初九陽剛居下得正既無陰柔之牽上無係應天絕  
偏私之擾此其說也可謂和矣惟剛而說故說而和  
一皆說之以道而不以私也吉孰加焉和而晏子和  
美之謂所以和而不稱同也象曰行未疑也凡行之有  
所疑者雖說而非和也以陽剛之正處說體之初與  
陰柔畧無所係所謂和也者天下之達道也坦然而  
行何疑之有

九二孚允吉悔亡 象曰孚允之吉信志也

九二以陽居陰又與三陰密比宜有悔也惟由剛中  
之德以感孚其心而絕無意必於其間則說非妄說  
而說之以誠柔媚不得而惑之矣所以吉而悔亡陽  
剛在中有孚之象、曰信志也本剛中之志處允說  
之時所說必以道而非道則不說此其在中之志為  
可信必不為六三所惑也易事難說雖小人亦信而  
莫之忌矣

六三來允吉 象曰來允之吉位不當也

六三陰柔不中不正為下允之主因承柔俱剛不與

已同乃來上六之同情者而說之說不以道未免同  
流合汚之偏也故曰位不當也以陰居陽位既不當  
不免為邪媚之小人矣立身不當徒以柔媚取說于  
人即此便為玄德

九四商兌未寧介疾有喜 象曰九四之喜有慶也

九四重兌時值正秋商音用事化機閉藏故為商兌  
之象八音律中庚則曰商商傷也此心殊未寧也然  
商本金氣堅介勁疾無所沾滯而萬寶告成何喜如  
之即說卦傳所謂兌正秋也萬物之所悅也故曰悅  
言乎兌是也四陰故商兌而未寧九四故介疾而有

喜喜而由于介疾乃允說之正也象曰九四之喜有  
慶也天地陰陽之氣萬物生長之機皆于此歟之如  
此非喜天下之大慶歟

九五孚于剝有厲 象曰孚于剝位正當也

九五陽剛中正與上六密比而上六陰柔兌之主也  
五誠信而說之不知陰能剝陽雖孚信非私交陽剛  
尚未受剝然善柔便佞最易說人不虞其害已而信  
之深則剝之勢成矣不有危厲之失乎夫以九五之  
盛德尚惧有孚剝之危故卦辭示以利貞而聖人畏  
孔子遠佞人良有以也兌正秋也過此則為九月之

剝矣故象乎剝象曰位正當也九五正當剝位信之  
過則必有害于正故有厲也二五之孚皆由剛中  
四曰商兌五曰孚剝皆以時取象商八月剝九月也  
上六引兌 象曰上六引兌未光也

上六柔居說極無所不說者也不特引六三之同類  
而已據其在上柔說之情凡衆陽之在下者皆將引  
而致之以遂其媚世說已之願矣象曰未光也柔悅  
在上律以剛中之道終未脫乎引誘之私安得為光  
明乎三上乃兌之主爻然而皆陰柔也三來兌不當  
上引兌未光可見以柔取說終未盡善



風水渙

三 坎下  
巽上

渙亨王假有廟利涉大川利貞 象曰渙亨剛來而不窮柔得位乎外而上同王假上同王乃在中也利涉大川乘木有功也

坎下巽上渙卦取風行水上水遇風則渙散且四之陽來居二二之陰往居四各離其群故為渙渙亨渙有亨通之道也剛在陰中故為王假有廟之象巽木坎水又有利涉大川之義然祭祀非五則媚神以傲福涉川非正則行險以傲倖故又曰利貞巽坎二卦皆剛中惟剛中則貞矣

象曰渙亨而其所以亨者何也剛自四柔居二而位中故不窮柔自二往居四而四本柔位且上同乎五故得位乎外而上同是二四各離其群一則成其坎體而不窮一則成其巽體而上同此所以亨也王假有廟王在中也九二在下卦之中既有剛中之德可以假廟故云王乃在中若止云王在廟中無當于渙矣下坎為川上巽為木乘木涉川所以成濟險之功皆治渙之道也可見格神濟險無所不利一本于剛中柔外而得乎道之正焉耳故曰利魁况居渙之時假廟涉川必如此為得正

初六用拯馬壯吉 象曰初六之順吉也

初六柔居坎下為渙之始而在所當拯者也然始渙即拯尚易為力惟馬壯則拯之速而可以出險故為用拯得馬壯之象夫拯有道可以出險故吉六雖質柔而履初剛有馬壯之象坎為美脊之馬象曰順也初渙易拯而拯則不陷順之道也故初不言渙惟拯之早則不至于渙矣

九二渙奔其机悔亡 象曰渙奔其机得願也

九二剛自外来而得乎中是渙奔散趨適得其机則有所憑藉而安矣故為渙奔其机之象九剛故象奔

且自外来亦有奔之義二中故象机且坎為株木亦  
有机之義方其奔而来也若不免於悔及得中而安  
居也則悔已即表傳剛来不窮之謂也象曰得願也  
盖欲安者其所願而安莫安于二之中九得二以為  
安不有以遂其中心之願乎

六三渙其躬无悔 象曰渙其躬志在外也

六三陰柔不中不正形體滯于陰猶未離乎坎也然  
陰必賴陽剛以渙散之三位本陽且高出坎險之上  
與上九陽剛正應為能合陰從陽渙散其有我之私  
故為渙其躬之象此身不為陰柔所牽則耳目口鼻

之欲不足以役之獨超形氣之表矣既出乎險夫何  
悔象曰志在外也外雖指上九之陽剛然所志在外  
不肯局于形氣之內則有志在天下不徒在乎一身  
必換其窮以行其志而以萬物為一體矣

六四換其群元吉換有丘匪夷所思 象曰換其群元  
吉光大也

六四得陰柔之正且巽乎出乎坎險之外正所謂柔  
位乎外而上同者也當各相朋黨不相混一之時獨  
以正上同而下無私應能換散陰類之群為所以大  
善而吉也况六自二往居四舍下二陰既以換散其

陰群乃上與九五同體而聚歸若有丘之高矣散之  
中有聚此豈平常思慮所能及哉群指初與三丘指  
九五巽為高等夷即其群也象曰光天也散柔群以  
承剛君散所以成聚此其心術光明正大真非等夷  
之思所能及矣

三四內外二爻本風水之交換躬則內為無我換群  
則外為無人此所以內無悔而外光大矣

九五渙汗其大號渙王居无咎 象曰王居无咎正位  
也

九五陽剛巽體當渙之時大號令以約束民心如汗

之出而不反故為渙汗其大號之象而今出惟行矣  
况大號之渙也渙之以王居也王居九五中正之位  
出命令以詔誥天下庶王心之誠意浹洽于四方則  
能合天下之渙矣夫何咎坎水在下有渙汗之象巽  
有命能之象王居即九五正位之象象曰王居無咎  
正位也出天下之大號匪居天下之正位未有能免  
其咎者茲號令之出一本于九五之王居則體元居  
正民莫敢有不信從也故無咎

上九渙其血去逖出無咎 象曰渙其血遠害也

上九以陽剛居渙極則陰柔盡散坎險遠出矣故為

二五  
換其血去逃出之象坎為水為血既換其血且去而  
遠出夫坎難為蓋亦巽之極而禍患自遠也故無咎  
象曰換其血遠害也巽順以遠乎坎險之害即所謂  
去逃出也逃即遠也故不必血下加去亦不必改逃  
為惕  
五換汗而陽澤溢上換血而陰毒除即一身以言換  
而天下無不換矣



三三  
坎下  
坎上

節亨苦節不可貞 彖曰節亨剛柔分而剛得中苦節不可貞其道窮也說以行險當位以節中正以通天地節而四時成節以制度不傷財不害民

兌下坎上節卦取坎為流水澤為止水下澤以注夫上坎之流故為節節亨凡事有節則裁制得中可以變通而不窮常行而無滯也但過而不節非中也節而大過則苦矣苦節則膠滯不通人情難堪入可固守以為正乎 彖曰節亨剛柔分而剛得中坎陽兌陰剛柔分也二五皆陽剛得中也且三陰三陽剛柔

有限而陽剛居中此節之所以為節也苟節之過而至于苦則其道寤塞反不亨矣此苦節所以不可貞也寤則不亨不亨其可貞乎然非節之本不貞也以卦德言之內兌外坎兌說坎險而卦之所以為節者兌也兌以節坎故曰說以行險自不至於苦也自九五言之陽剛當位其于兌節而坎在兌上水滿則流雖節而通矣故又曰中正以通節而當位變通一出于中正亨之義也反是則過中而苦矣况推之天地之氣運有節則分啓閉弦朔晦望而四時不差歲功以成聖人體天地之節立為制度量入為出故不傷

財不害民此節之所以通而不至于窮亨而不至于  
若者惟其中而已矣可見節一也中則亨不中則不  
可貞觀節之象而玩其辭當自得之

天道一歲二十四氣中有節此卦適當六十卦三  
百六十五過與一歲三百六十餘日相當象云天地  
節而四時成乃是實象

初九不出戶庭無咎 象曰不出戶庭知通塞也

初九陽剛兌體與四相應非不能進者然遇二之陽  
剛在前時方閉塞不可進也初能自守以正節而不  
行故為不出戶庭之象當節之初知節之早自不至

于坎險係辭謂其慎密不出是也故無咎象曰知通  
塞也通則行塞則止節之道也險塞于前時不可出  
此初之所以中節歟

九二不出門庭凶 象曰不出門庭凶失時極也

九二德本陽剛居中亦足有為之時使能乘時而出  
可以應五而出其險矣乃剛居柔位知節而不知通  
故為不出門庭之象門稍出于戶然節不以時坐失  
事機凶之道也初前遇九二陽奇為戶象九二前遇  
六三陰耦為門象可見二能塞初三不能止二象曰  
失時極也人之出處宜各當時方為中節九二值可

為之時而係于六三私暱之陰固守不出則失時極矣失時即失其節矣寧不免于凶哉

人知不出為節孰<sub>也</sub>當出而出亦節也道可大行苟固守不出是出處不中其節而失時極矣非凶而何比所以謂丈人潔身亂大倫而嘆荷蕢之果也

六三不節若則嗟若無咎 象曰不節之嗟又誰咎也六三以陰居陽不中不正且為兌說之極不知節者也喜極悲來將入坎險故曰不節而嗟焉然嗟雖由于不節而能嗟則知改過將能<sub>也</sub>不能節以處坎故無咎兌澤滿而溢有不節之象兌為口且近坎有嗟之

象象曰不節之嗟又誰咎也嗟嘆雖無禱于己往  
尚知悔于將來則能自悔者誰其咎之此與同人初  
九同若解六三入誰咎乃釋自我致戎原非無咎意  
義

六四安節亨 象曰安節之亨承上道也

六四陰柔得正且能上承九五剛中以自撻節則安  
然于所居之位而無一毫勉強意必之私夫固自然  
有節者也且坎水有節則居安資深惟其安也無往  
不利取之左右逢其原也故亨象曰承上道也安居  
柔位順以承上又何所不亨通哉

九五其節吉往有尚 象曰其節之吉居位中也

九五陽剛所謂當位以節中正以通者也故為其節之象夫剛者味之中其節者節之中節而其為則盡善盡美吉之道也以此達之天下自能隨事順應變通時宜何往而不可嘉尚乎九五坎水在乎允澤之上有其節之象坎滿則流出允澤之外為往有尚之象象曰居位中也天下之道中而已矣以剛中之德居中正之位中則其而不苦吉在是矣即中庸所謂發皆中節之謂和和也者天下之達道是也

上六苦節貞凶悔亡 象曰苦節貞凶其道窮也

上六柔雖得正然后險之終節之極勵其節操有舉  
世有所不堪者而堅忍以當之蓋亦極其苦矣故為  
苦節之象其事雖正而不合于時其守雖正而見嫉  
于世故貞而凶但身故不免于凶而其心之所欲為  
者必耐此而後有以遂其所願故悔亡象曰其道窮  
也勵苦節之志獲守正之凶而道于是窮矣豈道足  
以窮之哉節之苦者窮之也或可難艱困阨于一人  
而未可公行天下或可勉強植立于一時而未可通  
行於萬世皆窮之凶也但窮而以道凶而以正求仁  
得仁又何怨彖傳所謂苦節不可貞其道窮也正指  
此文言之



巽上  
兌下

中孚豚魚吉利涉大川利貞 彖曰中孚柔在内而剛  
得中說而巽孚乃化邦也豚魚吉信及豚魚也利涉大  
川乘木舟虛也中孚以利貞乃應乎天也

兌下巽上中孚卦取澤上有風風行澤上而中相感  
孚故為中孚中孚有孚在中誠能動物也何也豚魚  
皆澤物風性凡風之將動豚魚信于未發之前皆浮  
水以巡之故為孚及豚魚之象風水相感信及豚魚  
孚之至也所以吉也水在澤上又為利涉大川之象  
且其所信者絕無人為之偽而一循天理之真為能

得乎道之正也故又曰利貞豚即江豚風之見信于  
豚魚與虛舟隨風以往來水面皆天機自動有莫之  
為而為者人之中孚亦必如是而後為正也夫以中  
孚之德而猶必利乎貞豈易言哉 彖曰中孚柔  
在內而剛得中六三六四以柔而在內是中虛所以  
受信九二九五以剛而得中是中實所以為信此中  
孚之義也以卦德言之說而巽孚乃化邦也說則和  
順而易從巽則漸漬而不迫下說以孚乎上上巽以  
孚乎下無往不孚無往不化夫固可以化萬邦矣卦  
辭豚魚吉何也信及豚魚也如風見信于澤中之豚

魚信在言前不言而信也利涉大川何也乘木舟虛也木舟內虛外實可以順風上下而涉川濟也中孚以利中何也乃應乎天也誠者天之道也中孚一出于正則天機之動一皆自然而然者誠感誠應如豚魚虛舟之于風澤而無一毫勉強滯泥之私矣噫中孚利貞應乎天夫焉有所倚

初九虞吉有他不燕 象曰初九虞吉志未變也

初九陽剛得正雖與六四正應而六三則同體也若孚而稍涉偏係非中孚矣故當憂虞撥度以精察其一念初發之機庶無二無雜而閉邪以存其誠斯中

孚獲吉即象傳利貞應天之義也若初念不謹未免  
他有所係則內省有疾此心其能以安寧乎况允主  
說其初不可不慎亦因以戒其他志云耳他指六三  
象曰初九虞吉志未變也一卦二陰其志易變雖初  
剛得志其志于正應本不他求為虞度則防之蚤而  
志不變矣否則能保其所志之無他乎

九二鳴鶴在陰其子和之我有我爵吾與爾靡之 象  
曰其子和之中心願也

九二德本剛中九五亦剛中在上同德相孚故為鳴  
鶴在陰其子和之之象夫鶴之聲長而遠聞由其發

之中者大故乎之遠也小雅所謂鶴鳴于九臯聲聞于天是也鶴之鳴雖在二陰之下臯澤之中而其子和之同聲相應同氣相求不期然而然耳二五德皆剛中天爵乃其所同有者若吾與爾靡之則不能如鶴鳴子和之相孚矣可以人而不如鳥乎詞若相反意實欲其同德相孚于中也如此則靡字亦不必改作靡自二至五隔二陰為鶴在陰之象鶴鳴子和相為感應有中孚之相二五中隔二陰有靡之之象子與爾皆指九五若以初九為子則鳴和皆在二陰之下與中孚全無意味係辭謂言行本于居室而千里

應之可証矣象曰中心願也鳴于下和于上一本諸  
中心之至願而我有好爵吾與爾靡之可以為中心  
之願乎象止釋上句故下文反意在中其矣

六三得敵或鼓或罷或泣或歌 象曰或鼓或罷位不  
當也

六三陰柔為兌澤之主適與巽風與水相遭故為得  
敵之象况水之在澤也風來則鼓而動風靜則罷而  
止風狂則號而泣風微則喜而歌倏忽之間變態不  
常則已且不能自信何以阜之于人鼓罷泣歌皆風  
澤實象象曰或鼓或罷位不當也三本陽位而陰來

居之位既不當是以動靜皆係乎人而人已適足相  
敵中孚顧而是哉

六四月幾望馬匹亡無咎 象曰馬匹亡絕類上也

六四陰柔得正上承九五之剛中以相孚信是虛中  
能容如幾望之月于日光无所不受以四之位原與  
五同体也故有月幾望之象四陰與三陰相比猶馬  
匹也四則惟知上從乎五而亡其比三之私故又為  
馬匹亡之象如是則誠信乎上實有巽順之德矣故  
无咎象曰馬匹亡絕類上也下絕六三之匹類上從  
九五之陽剛一心以相孚而私累尽去何咎之有

九五有孚學如无咎 象曰有孚學如位正當也

九五陽剛中正與六四之陰同休相孚殆如同結構  
學而不可解故為有孚學如之象如此則陰陽契合  
可以固結天下之心矣故无咎夫五之于四雖陰  
陽各得其正但孚而曰孚果利貞應天之謂孚象曰  
位正當也小畜九五之於六四云有孚學如此爻位  
正與之相當履五否五氣五皆曰位正當其義同  
上九翰音登于天貞吉 象曰翰音登于天何可長也  
上九陽剛居一卦之外與兌澤睽絕徒為過高之行  
以矯情干譽何足以致人之孚哉故為翰音登于天



之象翼為鷄鳴則先振其羽而鳴亦有信但羽翰之音微而短身雖在上而其音安足以登于天哉視鶴鳴子和聲由中出者懸絕矣如此則孚于外而非孚以中聲聞過情君子耻之雖正亦凶翼為鷄上居翼極故象登天象曰何可長也契籠之鷄縱亦高善鳴其音何可長哉欲以虛聲孚天下難矣

小過亨利貞可小事不可大事飛鳥遺之音不宜上宜下大吉 象曰小過小者過而亨也過以利貞與時行也柔得中是以小事吉也剛失位而不中是以不可大事也有飛鳥之象鳥飛鳥遺之音不宜上宜下大吉上逆而下順也

艮下震上小過卦取四陰包乎二陽陰多陽少小者過矣故為小過小過亨陰本小也時乎小事雖過有亨通之義而所利則在乎貞然亦止可小事不可大事也即卦象現之如飛鳥遺之音其飛已過其聲若

有所遺不宜上而宜下亦以順陰性也故大吉何也  
 為過而音遺所過小矣然身與音而俱過迹與心而  
 俱忘既不惟悖上之愆且得夫宜下之性雖過而不  
 為過矣 彖曰小過小者過而亨也過以利貞與時  
 行也大凡過而亨也也多難于正而正非執一之謂也  
 與時偕行則其亨者亨以正也亨而無害于正亦時  
 乎小事不得不過焉耳柔得中是以小事吉也指二  
 五也剛失位而不中是以不可大事也指三四也柔  
 本小剛本大其可與不可各以卦位言之正所謂利  
 貞其行也有飛鳥之象焉此則以卦之全體現之內

二陽外四陰有飛鳥舒翼之象鳥舒翼而飛有過之象鳥鳴立則首向上飛則首向下飛鳥遺之音不宜上宜下大吉上送而下順也此又以鳥音取小過之象上送謂五上以陰乘陽而震動于上故送故不宜上下順謂初二以柔承剛而艮止于下故順故宜下觀鳥之過而其音雖遺其實一過不留所過者化上下一順乎時宜所以為大吉歟以陰陽小大言之因可小不可大以上下順送言之則宜下不宜上觀上震下艮有宜止不宜動之象可不可宜不宜即時行利貞之謂也

小過之亨全在利貞而所謂貞者時乎剛失位而柔得中故可小事不可大事而得中乃亨者此也然二五皆得中也以順遂言之又宜上不宜下豈小者盡可過而亨哉諒哉貞未易言也

初六飛鳥以凶 象曰飛鳥以凶不可如何也

初六陰柔在下本不宜動乃與九四動体相應當艮止而反動其動也過矣故為飛鳥以凶之象夫初與上皆羽翰之末也鳥之飛也身一動則羽不能止直欲高翔遠舉而已後故以此而凶也小過卦象飛鳥鳥飛用翼故于初上言之象曰不可如何也自取其

凶吾未如之何矣

六二過其祖過其妣不及其君過其臣無咎 象曰不及其君臣不可過也

六二柔順中正在家為妣在國為臣妣所以配祖臣所以事君祖謂人之始即初爻是也君謂臣之主九三是也一卦二陽三爻之陽為下卦之主有君道焉二卦雖過其祖與初密比而為之配則過其妣矣祖尊而親也過其祖猶得光前之道也君則尊無二上矣君其可過哉安其分而不進且本三爻之下則不及其君過其臣也如此斯為守正得中故無咎即上

下順柔宜上宜下之謂也論語拜下禮也今拜乎  
上恭也雖違衆吾從下此爻得之象曰不及其君臣  
不可過也君臣之分等于天地臣其可以過言哉二  
之所以不及君者居三之下安臣之分而不敢過焉  
耳

九三弗過防之從或戕之凶 象曰或戕之凶如何  
也

九三雖剛而得正豈能過群陰哉蓋此卦名曰小過  
六爻四陰二陽而初二五上四卦皆過正所謂小者  
過矣九三九四皆陽爻故陽弗過也然三與上應而

此卦艮乃止體既復過之當力防之庶有以得防患之道苟不能嚴為之防致令小者已過復應而從焉則陰或得以戕之而不免于凶所以戒三者至矣或字有不專指上六之意本卦陰多有弗過之象三上相應有從之之象象曰從或戕之凶如何也陰過必害乎陽所以陽雖不過猶當有防害之道若輕從之必為陰所戕也其凶當如何哉

九四无咎弗過遇之往厲必戒勿用永貞 象曰弗過遇之位不當也往厲必戒終不可長也

九四震體以剛居柔而不自恃其剛則能順乎小過



之時矣故无咎夫群陰方盛而四本陽剛故弗過但陽居陰位初陰在下又適遇之即恬退以俟時也若又因其震動而求以必往是乃危厲之道不可不戒凡此皆守正之道也要當變而通之與時宜之勿用永守其貞而執一不通斯善矣何也陽固不可往從乎陰而時苟可以濟陰則過以從時亦其居震之体必如此而後可以無咎正與象傳利貞時行互發明也過即四陽居陰應初之象往厲戒皆震之象象曰弗過遇之位不當也本陰位而陽居之為弗當也往厲必戒終不可長也震陽弗往弗過豈可執此為長久

之計哉即勿用永貞之謂也

卦名小過本以四陰過二陽也故三四二陽爻皆云  
弗過三之防防上也四之過過初也上在三之上初  
在四之下亦上遂下順之義也

六五寂雲不雨自我西郊公弋取彼在穴 象曰寂雲  
不雨已上也

六五陰柔尊位陰過盛矣雖當小過之時抑豈能成  
其功哉陰盛陽微陰上陽下陰過乎陽則陰陽不和  
故為寂雲不雨自我西郊之象陰柔不能大有所取  
特可弋取在穴之微物耳徒知六二之陰與已相同

弋而取之以相助故為公弋取彼在穴之象西郊陰  
方也震艮皆東方之陽故指陰為西郊即六五弋乃  
事之小者穴亦陰處指二言也總謂陰小不足以大  
有為也象曰密雲不雨已上也陰陽和則雨澤降陰  
在五位則已上乎三四之陽是陰氣過高不與陽氣  
和合豈能成霖雨澤萬類哉此又見小過為不可也  
與小畜卦辭意義同

上六弗過過之飛鳥離之凶是謂災青 象曰弗過過  
之已亢也

上六陰柔居動体之上陰過之極宜與三相應而自

處大高既弗過之而陰反過之陰過乎陽過亢必凶  
故為飛鳥離之之象大為飛離下而上亦已高矣不  
知止乎丘隅則必麗網矰之凶是謂天災人責莫之  
能逃矣上亦有陰離陽之象已亢陽亢則凶在五已  
上則不雨在上已亢則災責正所謂上遂不宜上也  
可見陰之過非陰之福

陽上陰下道之常也四本陽爻處初陰之上故曰弗  
過過之上本陰爻處三陽之上故曰弗過過之皆實  
象也

水火既濟

☵☲  
離下  
坎上

既濟亨小利貞初吉終亂 象曰既濟亨小者亨也利貞剛柔正而位當也初吉柔得中也終止則亂其道窮也

離下坎上既濟卦取水在火上水火相交各得其用故為既濟謂萬事已濟也六爻初與二交三與四交五與上交陽交于陰交則既濟可知矣一卦水上火下有既濟之象既濟亨而其所以亨者亨于陰柔之小耳何也卦象三陰皆在三陽之上也然六爻剛柔各當正位亦有利貞之義初吉終亂以柔在二則吉

在上則亂卦象離明在內坎險在外亦有初吉終亂  
之象治極而偷安亦陰柔為之也是以獨致意焉  
彖曰既濟亨小者亨也水賴火以致用剛賴柔以成  
功故也利貞剛柔正而位當也六爻剛居剛位柔居  
柔位各當其正而利于貞也初吉柔得中也指六二  
也終止則亂其道窮也指上六也自一卦象觀之剛  
中端拱于上柔中靖共于下有百為乾叙之象然亨  
於小不亨于大亨於始不亨于終可見成九五既濟  
之治功者固賴六二之柔順成九五既濟之宴安者  
實由上六之陰柔是道不自窮終不自亂由治定功

成則止心一生怠荒宴僻无所不止至而亂即伏于治  
矣其止也止于柔也止則亂不止則不亂致治于道  
不窮者慎毋以既濟而忽諸

九處既濟之世者多徂於習尚而初獲於小亨然溺  
于宴安則亂生于終止自古皆然此卦描寫殆盡

初九屯其輪濡其尾无咎 象曰屯其輪義无咎也

初九陽剛離体當既濟之初雖有能濟之才而未敢  
輕濟如與將濟水而屯其輪其謹戒也如此然既屯  
其輪縱如歎之將濟濡其尾而亦可以濟故无咎卦  
取剛柔相濟此取濟坎之義輪在下尾在後皆象初

則有屯之象在坎下有濡之象也象曰屯其輪義无  
咎也初剛雖處坎下而能以正自守故以義揜之可  
无咎矣且當既濟之初而極屯輪之慎聖人示人豫  
防之意至矣哉

六二婦喪其茀勿逐七日得 象曰七日得以中道也  
六二具文明中正之德時當既濟雖九五陽剛正應  
在上然為初三兩剛所逼故為婦喪其茀之象斯時  
也二惟以中正自守久而正應者合故又為勿逐七  
日得之象夫六二以陰居中婦之象也婦之出門必  
賴茀以自蔽而喪茀則不可行矣然茀之喪特失其



在外者耳若因而逐之則因外物而失其在我之貴也故以為戒七日者二與五為七象曰七日得以中道也二五以中道相得而相應也人可因外之得喪動其中卦

此文與睽初九喪馬勿逐自復同此柔正彼剋正也九三高宗伐鬼方三年克之小人勿用 象曰三年克之憊也

九三剛明在內卦之上當既濟之時或外夷恃其險阻亂我邊鄙則伐暴安民乃陽剋之所必有事者故為高宗伐鬼方之象以中興之賢君伐遠方之小夷

不急近功不貪小利至三年而後服也故又有三年  
克之之象斯時也小人好大喜功每欲逞威于絕域  
此又剛于剛暴者故戒之以勿用焉可見用兵乃不  
得已而小人則必不可用也坎險在前上六陰柔有  
鬼方之象離為戈兵有伐之象由三至上有三年之  
象密比四陰有小人勿用之象象曰三年克之憊也  
以高宗中興之剛猶不免師老財匱而有三年之憊  
然而不肯用小人以徼一時之功烏高宗可謂善用  
剛于既濟者矣

既濟昇平日久兵革罕用或有外倣率然興兵故難

而成功亦不易豈獨高宗為然哉

六四襦有衣袷終日戒 象曰終日戒有所疑也

六四雖柔順得正已入坎體當既濟之時思患豫防  
朝夕匪懈所以皇皇焉惟恐既濟即有後患隨之故  
為襦有衣袷之象夫襦者帛之始成也袷者帛之既  
敗也襦必為衣衣必至袷是衣袷乃繇之所必有者  
然襦方為衣之初已惧其為弊絮之袷所以終日戒  
慎无頃刻之寧此其畜治未亂保邦未危而先事豫備  
者至矣四居下離之上故有終日之象方濟坎險故  
儆戒若此象曰終日戒有所疑也四本多惧而疑之

深者自不容已於未然之防則終日之戒其殆終身之憂乎

九五東隣殺牛不如西隣之禴祭實受其福 象曰東鄰殺牛不如西鄰之時也實受其福吉大來也

九五以陽剛中正之君撫既濟之運知時方治平安不忘危不可不及時為之慮也以祭視之東鄰殺牛物固豐矣不如西鄰禴祭之薄為得其時而實受其福何也誠有餘而物雖不足夫固神之所必享也五剛中有中心自滿之意東陽也指九五西陰也指九二禴為夏祭離為夏時五居尊而時已過不如六二

在下而始得時也凡世道極盛多在謹始即卦詞初  
吉終亂雖各指二上之久而東西即初終之意也象  
曰東隣殺牛不如西隣祭之時也竇受其福吉大采  
也知祭以時為尚物非所論則福慶大采于既濟之  
時者未可限量矣此文指文王與紂無據

後天卦位乾坎艮震陽與陽為隣坎乃東之隣也巽  
離坤兌陰與陰為隣離乃西之隣也

上六濡其首厲 象曰濡其首厲何可久也

上六以陰柔處坎險之極既濟之終自恃無復有險  
難矣然忽心一生則險難立至當愆汨沃惡甚風波

故有濡其首之象濟而濡其首則載舟及溺矣其危  
為何如坎有濡象上有首象象曰何可久也既濟終  
窮至于濡首此豈長久之道乎卦終則變治極則亂  
生矣即象傳所謂終止則亂其道窮是也

火水未濟

  
坎下  
離上

未濟亨小狐汔濟濡其尾無攸利 彖曰未濟亨柔得中也小狐汔濟未出中也濡其尾無攸利不續終也雖不當位剛柔應也

坎下離上未濟卦取火在水上不相為用且六爻失位故為未濟未濟亨未濟有可濟之道求濟有必亨之時其實只是柔中故亨觀之卦象如小狐當離上而汔濟值坎下而濡尾故無攸利全卦首剛尾柔兼初終而言狐善渡水而病于尾之火汔濟濡尾即未濟之象 彖曰未濟亨柔得中也自全卦觀之六五

柔中居坎上有可濟之道故亨也然謂之未濟何哉  
小狐汔濟未出中也指下坎二爻言之陽剛雖得中  
而尚未出中者即坎卦九二求小得未出中之義也  
濡其尾無攸利不續終也指下坎為濡而尾指初也  
說文曰汔汔惟離在上而水涸則小狐可濟然坎在  
下尚濡其尾不能接續于其後故為攸利耳未出中  
濡其尾此所以為未濟也然豈終不可濟哉雖不當  
位剛柔應也六爻剛居乎柔柔居乎剛雖于位皆不  
正然一陰一陽未嘗不應二五卦主以中相交事雖  
未濟而可濟者即此乎在果能協力相應以出險則



未濟者終于濟而亨通之道備是矣

初六濡其尾吝 象曰濡其尾亦不知極也

初六以陰柔之才處未濟之始不足以有濟也乃冒  
險以進而急於救濟必至濡尾于坎險如是而求濟  
則亦可羞吝矣蓋凡獸尾之大者必搯其尾而後能  
濟亦必獸之大而有力者方能搯其尾焉初六陰柔  
在下其才力為何如也故有濡尾之象象曰亦不知  
極也未濟之初即有欲濟之心不自知其小者弱也  
故不自量力必欲大有為焉亦不知終極之必無成  
矣

九二爻其輪貞吉 象曰九二貞吉中以行正也

九二陽剛得中本足以濟險難然猶居柔守順如御  
車者曳其輪而不敢以輕進馬如是則剛柔相濟安  
不忘危為能行乎出險之正道而吉在是矣坎剛中  
有輪馬象尚在坎中有曳輪之象剛中而慎有得正之  
義象曰中以行正也以九居二固為得中然獨濟坎  
險猶不肯馳驟車輪以自忘其持重之意非中以行  
其正乎

既濟初剛惟不曳輪雖濡尾無咎未濟初柔故濡尾  
吝二剛故曳輪吉皆象也

六三未濟征凶利涉大川 象曰未濟征凶位不當也

六三以陰柔處上下之交時方未濟即欲征行求進凶之道也但身在乎涉川之際而承乘應皆陽剛之才果能不自用而協衆能以共濟如涉川者付之操舟之群工而不自為焉則大川其利涉矣此爻在兩卦之間將濟而尚未之濟故獨曰未濟越本爻以就上卦故曰征凶藉衆力以出坎險故曰利涉自用則凶用人則利坎即大川之象三處坎上爻亦有利涉之象象曰未濟征凶位不當也

三剛位不柔苟不藉陽剛之力而求以濟險也難矣

初濡尾在坎之下二曳輪在坎之中三涉川在坎之上也

九四貞吉悔亡震用伐鬼方三年有賞于大國象曰貞吉悔亡志行也

九四以剛居陰宜有悔矣然處未濟之時不可純用乎剛惟剛柔相濟是以貞吉悔亡斯道也古人嘗震懼不寧用以征伐鬼方三年有賞于大國夫伐遠宜于速攻而不憚夫三年之久老成持重此

豈剛暴者可能哉震伐何其剛也三年何其柔也  
所以貞吉而廢大國之賞也脫坎為離故其象如  
此象曰貞吉悔亡志行也處未濟者志存于必濟  
四處坎上志不于此而大行乎

六五貞吉無悔君子之光有孚吉 象曰君子之光  
其輝吉也

六五柔中時雖未濟為能虛中資九二之剛以共  
濟斯貞吉無悔然其所以吉者何哉五本離明之  
主美在其中暢于四支發輝于事業煥然為君子  
之光而事無不濟則信乎其為吉矣光輝即離中

虛明之象故象曰其暉吉也以君子之光一本于  
在中之暉故照臨萬邦光被四表其德暉之發越  
要皆文明之不可掩矣此其所以為吉歟

上九有孚于飲酒無咎濡其首有孚失是 象曰飲  
酒濡首亦不知節也

上九才本陽剛以離明之終與下坎三相應且卦  
終當變則時亦將濟矣于此有孚以安飲酒之常  
而俟其濟焉斯無咎也若飲酒至濡其首而過為  
宴安吾知窮通理數固亦必然而有孚其失是也  
坎為水離上應坎有飲酒濡首之象蓋人處未濟

之時惟孚信正應以俟有時之濟則可苟溺于宴  
俯則向之所謂有孚者反自失之矣因其上下相  
應故許其無咎因其皆不中正又戒其失是象曰  
亦不知節也夫乾元用九自然之天則也處未濟  
之終固不可躁心以求濟亦不可怠心而忘濟勿  
忘勿助剛柔得中乃為知節若離之信坎至于濡  
焉謂之知節可乎故曰亦不知節也亦字宜玩可  
見易之道中而已矣始焉示之以天則終焉示之  
以知節無非欲人知所節而歸于天則自然之中  
也果能時時中節而此心之真知不昧乎時中之

易大象義致

豫章後學章潢本

易自伏羲畫卦文王繫辭周闡六爻孔翼各傳易之道燦然明備矣然大象傳則又自一卦兩體開示學易之法其象至賾而至顯其辭至簡而至奧雖於文周卦爻旨意不相沿襲其剖露發洩義畫則一也卦爻或吉或凶而大象則無有不吉每象謂之以者直以天地萬物之變化會之身心也果能神明於中觸處洞然豈徒天地雲雷皆我健順經綸之蘊而否剝困蹇一皆脩德遂志之助道與



象昭心與易游則是易也無一處無一時無之也  
但孔易因象以命辭後儒忽象而談理其晦也久  
矣噫易固吾人自有之易也敢不勗哉

易大象義欽終